

Judaspa Jesús Chanīmara Faafō Kirika Kenexō Fomani

Judaspa ato kirika kenexoni a Nios Ifofafo

¹ Ņkīa Judas, Santiago āfe exto. Nōko Ifo Jesucristo ē yonoxomis. Ē mato kirika kenexoni a Epa Niospa mato noikī mato ifini tii āfenākōi faxiki. Akka Epa Niospa nōko Ifo Jesucristoōxō mato kexesharafafāini. ² Epa Niospa mato noikī, mato inimamasharakōinō māto ūiti fekaxteyamanō, askatari mato noikīfinakōinō.

Fetsafāfe chanīfisti ato yoipaonifo (2 Pe. 2.1-17)

³ Efe yora mīhtichi, nōko Ifāfe noko nāxoni keskara ē yoi, a noko imapaiyai keskai nō chipo afe ixiai keskaraōnoa ē mato kenexopaiifīkī mē nika mā meka fetsa yopaito. Nāskakē iskaratīa ē mato kirika kenexoni mā Jesucristo nikakōiyānā mā shināfafāinō. Nānori Epa Niospa āfe Fakeōxō noko tāpimani. Nā āfe Fakeōnoa noko tāpimani keskafakī nā fisti nō yopai Ifo sharafaxiki. Akka meka fetsa mato fanīrira yoipaiyaifāfe ato nikatamaroko nā mato yoini keskara nā fisti nikakōikāfe. ⁴ Yora chakafo mato mēra fōkaxō anorima mato pārakani chaka tāpimapaiakakī. Afokai Niospa yorafoma. Akka nō afara chakafamisxakī nō Epa Nios yoaito nōko chaka noko soaxonano nō afe ipaxatiro. Nāskafekē nāfāfe fanīrira chakakōi mato yoipaikani, iskafakī mato yoipaikakī: “Mā Jesús Ifofaxō nā mā

apaiyai keskara mā atiro, mātō āfima fe mā ikaino, kērofori āfe fenema fe itirofo. Nāskaxō nā afara chaka fetsafo mā apaikī mā atiro. Mā askafaito Niospa mato omiskōimatiroma,” ikaxō fanīrira mato yoipaikani. Nōko Ifo Jesucristo fisti nikakaspamisfo. Nā keskarafoōnoa Niospa shināmanaino keneyonifo Niospa ato omiskōimakī finakōixii.

⁵ Akka mā mā tāpifekē anā ē mato yoipai nōko Ifāfe Ejipto anoa israelifo ato ifini anā omiskōinōfoma. Akka ato ififinixakī chipo a chanīmara faafoma ato keyokōi reteni. ⁶ Nāskatari Niospa āfe ājirifo taeyoi Nios fe isharayopaonifo. Nāfāferi Epa Nios yonosharaxoyopaonifo. Nios fe isharafiakatsaxakī atirifāfe afara chaka shinākakī anā Nios Ifofapainifoma. Askaifāfe ūikī Niospa kaninānā metexkereaxō fakishifā mēra ato nīchiyoni. Nāskaxō nā nikamisfoma ato omiskōimanaitīa ato ichanāfaxō nā omiskōipakenakafo mēra ato potaxii. ⁷ Nā Niospa ājirifāfe afara chakafapaonifo keskafakī Sodoma anoaf feta Gomorra anoafāfe a pexe rasi ano chaima ikafāferi nāskafapaonifo afara chakafakakī. Feronāfakefāfe āto āfimafo chotaifono, kērofāferi āto fenemafo chotamapaonifo. Askatari feronāfakefo āa ranā chotanāpaonifo, kērofori askapaonifo āa ranā chotanākani. Nāskarafo ūikī Niospa ato omiskōimani, chiifā tokiriya nai mēraxō atoki potani. Nā askafanioxō Niospa noko tāpimani. Nā tāpixō nō tāpitiro fatorafāfe āto chaka xateyamakanax nāskarifiakani, chiifā mēranoax omiskōipakenakafo.

⁸ Nāskarifiakī nā chanīmisfāfe afara chaka

fisti shināfafāikani. Nāskakaxō afia āto namapa ōia keskafakakī, nāskakōi fakani, āto yora chakanafakakī. Askatari Nios nikakaspakani. Nāskakaxori Niospa ājirifori īchamisfo. ⁹ Akka Niospa āfe ājiri Miguel xanīfokōifixō atokai Satanás īchanima. Mā Moisés naano Satanás Miguel fe feratenāni. Miguel Moisés āfe yora maifapaifiaino, akka Satanás Moisés āfe yora chakafapaixikī fipaini. Askafaito ūikī Miguel afe feratenāfikī īchanima. Yoikī iskafani: “Satanás, ē mia afeskafatiroma. Akka ēfe Ifo Niospa mia yoinō mī omiskōinō,” ixō yoini. ¹⁰ Akka nā feronāfakefāfe mato mēra fōkaxō nā afaa tāpiamafikaxō meka chaka yoimisfo. Askatari nā apaiyai keskara fisti famisfo, nā yoināto shināsharatiroma keskarafo. Nāskakaxō ãa afarafo chakafakanax omiskōipakenakafo.

¹¹ Ooa. Nā Caín ini keskarato. Caín āfe onefetsa noikaspapaoni. Nāskakē reteni. Askatari nā Balaam kori fisti fichipaikī Nios kachikiri fani. Na yorafori nāskarafori. Nāfori nā Coré keskarafo. Nā Coré āfe xanīfo Moisés nikakaspapaoni. Nāskakē nikakaspaito Niospa reteni, nāskarifikī nā ato pāramisfo Niospa askari faxii omiskōimakī. ¹² Akka mā noinākī ayayanā mā pimis nōko Ifo shināyanā. Akka nā yora chakafori rāfitama mato fe ichanākaxō nōko Ifo shināmisfoma. Fetsafo noitama ãakōi noimemisfo. “Nō mato yoi mato kexesharaxiki,” ifiakaxō tsōa afaa yoisharamisma. Nāfo nā nai kōi oimais keskarafo. Nō nai kōi fakish ūikī mā oi feira nō fatiro inimayanā. Akka oi iyamaino nēfe nai kōi potano nō shināchakatiro. Nā ato kexemisfo keskarafofikanax afāfe nōko Ifoōnoa tsōa tāpiama.

Nāskatari nā yorafo nā ifi fimimistīa fimiayamai keskarafo. Nā ifi mā nai rafea keskarafo, mā nakē āfe tapo tsekatirofo. Nāskarifiakī nā ato pāramisfāfe tsōa ato Jesús Ifofamatiroma afe nīpaxanōfo. ¹³ Nāfo oa fakafā poo ikī fākox potatiro keskarafo. Nāskakaxō afāfe afaa shara yoitirofoma, mēxotaima afara chaka yoikani rāfimisfoma. Nāfo nā fishi keskarafo. Mā fishi nāmā pakexō, anā chaxatiroma. Nāskarifiai nā mato pāramisfo Nios kachikiri fakanax fakishifā mēra fokani, Niospa nā keskarafo ato tāpimakī ato omiskōimakōixii anoax omiskōipakexanōfo.

¹⁴ Nāskatari Enoc chipo fakeni, mā Adán afetīama Epa Niospa onifanino. Akka Enoc āfe xini ini Adán. Nā Enoc nā chanīmisfāfe ato pārānōpokoxiaifoōnoa yoini. Nāskata aato ato yoikī iskafani: “Nikakapo, ē ōia nōko Ifo oi, afe nai mēra ikafo fe ichapakōifo tsōa ato tanatiroma afe fexikani. ¹⁵ Nāskaxō ato yoipakexii nā niyoxō amisfo keskara. Keyokōi maitio anoafō nōko Ifoki fexikani, fatofomāki afe yorafo a afe ipanakafo ato ñinō, askayamai fatoforimākai a chanīmara fayamakanax omiskōipakenakafo mēra foaifo. Akka nā nikamisfoma afe yorafoma. Akka nā chakafamisfo tii ato yoita, niyokaxō Nios nikakaspapaonifoōnoa yoita, keyokōichi mekafakī chakafamisfoōnoari ato yoixii,” ixō Enoc ato yoini. ¹⁶ Nāfāfe yōachepeyanā ato mekafamisfo. Nā chakafapaiyai keskara fisti shināfafāimisfo. Askaxori fetsafo pārakaxō afara fiapaimisfo ea ināsharakanira ixō shināfafāimisfo.

Nā Nios Ifofafo ato yoisharani isharanōfo

¹⁷ Efe yora mīshtichi, nā nōko Ifo Jesucristoōnoa mato yoimisfāfe mato yoinifo keskara shināmakiyamakāfe. ¹⁸ Iskafakī mato yoinifo: “Nōko Ifo mā chaima oaino nā Jesús Ifofaafāfema mato kaxemetsama faxikani, Niospa meka nikakaspakakī. Nāfāfe afaa shinātama nā chakafapaiyaifo fisti shināfafāikani,” ixō mato yoinifo. ¹⁹ Nā keskarafāfe mato paxkanā fatirofo, afarafo chakafo shināfafāikani. Askarafo Niospa Yōshi Shara ato mēra naneama.

²⁰ Akka efe yora mīshtichi, kexemesharata isharakōikāfe Niospa āfe meka shara nikakōiyanā. Nāskakē kīfikāfe āfe Yōshi Sharaōxō mato imapaiyai keskara mato tāpimanō. ²¹ Nāskakē Jesús Ifosharakōifakāfe, Epa Niospa mato noikōiaito mā mā meemiski. Nōko Ifo Jesucristo noko noikōikī nō nafiakē noko nimapakenaka nō afe īpaxanō.

²² Fetsafāfe iskafakī shināifono: “Ētsa, chanīma rakikīa,” ixō shināifono, fenāmāshta ato yoisharakāfe nikasharakōinōfo. ²³ Oa afara chiifā mēra pakeax koofaito, nō koshi firisafatiro keskafakī nāskarifiakī fetsafāfe afara chakafaifono ato noikī yoisharakāfe Jesús chanīmara fanōfo, chiifā mēra foyamanōfo. Akka yora chakafinakōiafori mā ato noikī ato yoisharakāfe xatenōfo, chiifā mēranoax omiskōiyamanōfo. Nāskatari nō kooyoxō rapati chakana faxō nō anā fichipaitiroma. Nāskatari āto chakafo noikaspaifo keskara iyamakāfe. Ato noikōita nā afara chakafaifo keskafakī ato feta ayamakāfe.

Mā mekai xatekī Niosnoa ato yoisharani

24-25 Nõko Ifo Nios fisti finakõia, nãato keyokõi tãpiakõia. Askatari nãato noko ifimis. Äfe kerex sharaõxõ noko kexesharatiro nõ fenonõma. Nãato noko inimamasharakõi nõ nai mõra kai, afaa chakafamisma keskarax. Nã sharafinakõia, efpakõi, afama mõshti fatiro, tsõa atiroma keskafakõi nõko Ifo Jesucristoõxõ atiro. Nãskarakõi mõxotaima ïpanaka. Nã tii.

Ekõa Judas

**Niospa meka fena Jesucristoõnoa
New Testament in Yaminahua (PE:yaa:Yaminahua)**

copyright © 2008 Wycliffe Bible Translators, Inc.

Language: Yaminahua

Translation by: Wycliffe Bible Translators, Inc.

Yaminahua [yaal], Peru

Copyright Information

© 2008, Bible League International. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Yaminahua

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2018-11-16

PDF generated using Haiola and XeLaTeX on 11 Nov 2022 from source files
dated 29 Jan 2022

6c7b7ce2-9d87-5405-91e6-71ce1387adcc